

# JƆƆNN

## **gbounsinsinn nba ki u din sɔb ki tur Masiaweira nae na**

*Ki jün 1 Joonn gbouŋ na po*

Joonn sinsinn gbouŋ na jün barjara ŋanlee poe: Sinsinn tee lin kpaŋ karinteeb nae ki bii mɔk mɔtaauk nan Yennu nan u Bija Yiisa Masia, ki leer tee lin kpaamm ki bi daa waa faak tumiiu nba saa biir mɔtaauk na.

*Ki jün Yiisa Masia nba tee Yennu Mɔb na po*

<sup>1</sup> N sɔbin gbouŋ na ki teeni, a man wannii wunba ki bi yiu Yennu Mɔb nba teen niib manfoa na poe. Yoo nba ki Yennu din tan naan durinya na, ŋaan sɔɔ ki Mɔb maŋ poŋ be-e. Mɔmaan maŋ nba din sik tingbouŋ na ni yoo nba, ki ti gbiint u pinpauk, ki bia laato nan ti ninbina ki goriio, ki ti nii bia siito, <sup>2</sup> ki u din fiit ki ti set lau, ki mɔontir li siara ki teeni ki jün manfoor nba kaa gbennu na po. Manfoor maŋe din be ti Baa Yennu peŋ, ki ti Baa maŋ jiiu ki wannit. <sup>3</sup> Linba ki ti la ki bia gbate ki ti mɔontir ki teeni na, a yin fit taan nant mɔtaauk. Barmɔniie setik, ti mɔtaauk ni, ti taant nan ti Baa Yennu nan u Bija Yiisa Masia, <sup>4</sup> ki ti loon ki ti kur n ŋamm la parpeenn bonchiann. Li paake teen ki n sɔbin teeni na.

*Ki jün yentu na po*

<sup>5</sup> Tɔn, barrii nba ki ti din gbat ŋɔɔ Yiisa Masia boor ki mɔontir teeni na, li tee nnae: Yabint

Yennu tee yentue, ki bunbɔnn kaa u ni. <sup>6</sup> Ki ti-i yaa timm nan Yennu mɔk mɔtaauk nan leeb, ɲaan ki bunbɔnn be ti ni, ɲann ti fa faake ti mɔi ni, ki ti toona set want nan ti fa faake. <sup>7</sup> ɲaan li-i tee ki ti waa yentu sɔnu yoo kur, nan Yennu nba be yentu ni bianɲinba na, ɲann ti mɔk mɔtaauk nan ti leeb, ki u Bija Yiisa some ɲammit ti para ki nyint biit kur. <sup>8</sup> Tɔn, ti-i yaa ti ki mɔk biit, ɲann ti kpɔnn ti mɔɲe, ki barmɔnii kaa ti ni. <sup>9</sup> ɲaan ti-i yoo nyint ti toonbiit ki teen Yennu, tii mi nan u sii nyikit chabit ti toonbiit, ki bia ɲammit ti para ki nyint biit kur, kimaan u tee barmɔnii daanɔe ki bia tee popeendaanɔ. <sup>10</sup> Ti-i yaa ti ki tuun toonbiit, ɲann ti yiinɔ faak daanɔe na, ki u maan maɲ kaa ti ni.

## 2

### *Ki jiin Yiisa Masia nba tee ti sindantinno na po*

<sup>1</sup> N waas, n ki loon ki yii tuun toonbiiti. Li paake ki n sɔbin teeni na, ɲaan li-i tee ki sɔɔ tun toonbiit, ti mɔk sindantinno ti Baa Yennu boor, ki ɲɔɔe tee Yiisa Masia, wunba tee popeendaanɔ na. <sup>2</sup> Waa din sik ki tan gaar ti paak ki kpo na, ɲɔɔe ji teen ti maruɲ Yennu boor ti toonbiit paak; ki u maruɲ maɲ ki tee timm Masiaweira kuukɔɔ toonbiit paak kaa, ɲaan li tee timm nan tingboun na ɲaateeb kur toonbiit paake.

<sup>3</sup> Ti-i dia Yennu sennii, ɲanne saa wann nan ti set miu, <sup>4</sup> ki li-i tee ki sɔɔ yet a “N miu,” ɲaan bia ki dia u sennii, li yoo tee faak daanɔe, ki barmɔnii kaa u ni. <sup>5-6</sup> Ki wunba dia ɲɔɔ Yennu maan, ɲɔɔe set loonɔ nan u yan kur. Ki jenna,

daano nba yaa u gaa nano, see ki u binbenj tee nan Yiisa binbenj nba din tee bianjinba na. Nanne ki li daano saa bann nan u set gaa nan Yennu.

*Ki jiin lomm sennu po*

<sup>7</sup> N walonkai, maa sobin lomm sennu nba ki teeni na, li ki tee sennpaann kaa, njaan li tee sennu nba ki i din doŋ gbat ki li yukira na poe, ki sennkperu mane tee Yiisa maan nba ki i din gbat na. <sup>8</sup> Njaan motana li bia daa tee nan sennpaann nae ki n sobin ki teeni, kimaan yoo lebitire, ki bunbonn yentir, ki niib nunii yentir nan Yiisa barnanii. Sennu nae ki Yiisa binbenj ni din want nan monii, ki i binbenj na mun bia want nnae.

<sup>9</sup> Li-i tee ki wunba yaa u be yentu ni njaan ki ki loon u naa bik, njann u lek daa be bunbonn ni; <sup>10</sup> ki daano nba loon u naa bik, u be yentu na ni, li paak, siar kaa u ni ki saa te wun tun biiti. <sup>11</sup> Njaan wunba ki loon u naa bik, u be bunbonn nie, ki u benu ni mun bia bon, ki bunbonn manj doŋkin u numm powa, ki u ki laat waa saa siaminba po.

<sup>12</sup> N waas, Yennu nyik chabi i biita, Yiisa Masia sann ni; li paake ki n sobin teeni na. <sup>13</sup> N chanbaanba, i mi Yiisa nba poŋ din yoo be mokmok nan mokmok na; li paake ki n sobin teeni na. Naasimm, i nyann Sintaanii, bonbiiuk daano nawa; li paake ki n sobin teeni na.

<sup>14</sup> N waas, yaa mi ti Baa Yennu na, li paake ki n sobin teeni na. N chanbaanba, yaa mi Yiisa nba poŋ din yoo be mokmok nan mokmok na, li paake ki n sobin teeni na. Naasimm, yaa mok pan, ki Yennu momaan bia be i ni, ki i nyann

Sintaanii, bonbiiuk daano maŋ na, li paake ki n sobin teeni na.

<sup>15</sup> I daa loon tingbouŋ na ŋaateeb binbeni. I bia daa loon tingbouŋ na bona. Li-i tee ki soo loon tingbouŋ na ŋaateeb binben, u ki loon ti Baa Yennu. <sup>16</sup> Niib mək niŋ nan bin tun bi mŋ loomm, ki bia nian bona nba ki bi laat na, ki bia mək parbifaant, ŋaan linba na kur lek tee tingbouŋ na ŋaateeb niŋŋo; li ki nyii ti Baa Yennu boor kaa. <sup>17</sup> Tingbouŋ na tan saa gbenn, ki tingbouŋ na ŋaateeb niŋ na mun bia saa gbenn, ŋaan wunba tuun Yennu yanbootoona, ŋooe tan sii be mək mək nan mək mək.

*Ki jiin Yiisa Masia dataak na po*

<sup>18</sup> N waas, durinya gbennu yoo baat. I poŋ mi gbat a Masia dataak na saa baar; ki motana, Masia datai bonchiann poŋ baara, ŋanne te ki ti set bann nan durinya gbennu yoo baat. <sup>19</sup> Masia datai maŋ nyii ti nie, ŋaan bi ki tee ti yab kaa. Bi-i bonni tee ti yabie, timm nan ŋamme bo sii lakin be; ŋaan bi nyikita, ki li want nan bi ki tee ti yab setik nan monii.

<sup>20</sup> Yiisa Masia nba tee popeendaano nae sikin u Seyeen i paak, ki u te ki i kur mi wannu nba took. <sup>21</sup> Tɔn, li ki tee a i ki mi wannu nba took kaa ki n sobin ki teeni na, ŋaan yaa poŋ mi wannu maŋ na paake, ki bia mi nan faak wannu fok nan barmonii wannu na. <sup>22</sup> Ki ŋmee tee faak daano? Li tee wunba yaa Yiisa ki tee Yennu Niganntoo Masia nae. ŋooe tee Masia dataak maŋ, ki yeen ti Baa Yennu nan u Bija Yiisa maŋ. <sup>23</sup> Daano nba yeen Yennu Bija Yiisa, ti Baa Yennu ki be nano,

ɲaan wunba piak ki yeen a u teen yada nan Yiisa tee Yennu Bijæe, ti Baa Yennu be nanɔ.

<sup>24</sup> Yaa din sint gbat Yiisa maan nba pinpiik ni na, ii diar man. Li-i tee ki i dia maan maɲ, i sii gaa nan ti Baa Yennu nan u Bija Yiisa-e, <sup>25</sup> ki mɔsonn nba ki u senn ki turit na tee manfoor nba kaa gbennue.

<sup>26</sup> N sobin linba na ki teeni ki chekinti ki jiin niib nba yaa bin kpanni na poe; <sup>27</sup> ɲaan yimm ɲarin, Masia sikin u Seyeen maɲ i paaka. Seyeen maɲ nba biar be i ni na, i ji kii loon sɔɔ n wanni, kimaan Seyeen maɲ mɔɲe wanti bont kur, ki u wannu maɲe tee barmɔnii wannu, ki ki tee faak wannu kaa. Li paak, ii yɔɔ kii gaa nan Yiisa man, nan Seyeen maɲ nba wanti bianɲinba na.

<sup>28</sup> Barmɔnii, n waas, ii gaa nan Yiisa man. Li-i tee ki i yɔɔ gaa nanɔie, ti sii mɔk parcheenn, ki kan di fei u boor, yoo nba ki u tan saa jen na. <sup>29</sup> I mi nan Yiisa Masia tee popeendaanɔe; li paak, i mun bann nan binba kur tuun popeenn toona, bi mun tee Yennu waase.

### 3

#### *Ki jiin Yennu waas po*

<sup>1</sup> Lek gotir man lonbooru nba ki ti Baa Yennu mantik loont na. U lomm maɲ yab bonchiann, ki u teent u waas, ki ti set mun tee u waase. ɲaan tingboun na ɲaateeb ki mi taa tee nibooru nba, kimaan bi ki mi Yennu. <sup>2</sup> N walonkai, mɔtana ti tee Yennu waase, ɲaan li lek daa ki wann yent taa tan sii be bianɲinba. ɲaan taa daa mi linbae na, a Yiisa-i taɲi jen, ti tan saa la waa set tee bianɲinbawa, li paak, ti tan saa kpint ki tee nan

ηϞϞ nae. <sup>3</sup> Ki bia jenna, binba kur daan u jenu man po, ηamme dia bi mϞη fanu, nan waa be fanu bianjinba na.

<sup>4</sup> Binba kur tuun biit, ηamme biir Yennu sennu, kimaan toonbiit tumu biir Yennu sennue. <sup>5</sup> I mi nan Yiisa Masia din baar tingbouη na ni a wun nyinn niib biite; ki biit kaa u ni. <sup>6</sup> Ki wunba kur gaa nanϞ, u ki tuun biiti. Nnaan wunba tuun biit, u daa ki bann Yiisa nba tee wunba, ki bia ki miu.

<sup>7</sup> N waas, i daa saak ϞϞ n kpannini: daanϞ nba tuun popeentona, ηϞϞ tee popeendaanϞ, nan Yiisa nba tee popeendaanϞ na. <sup>8</sup> Sintaanii porη tee biitdaanϞ piinu niwa nan mϞtana, ki daanϞ nba tuun biit, ηϞϞ tee Sintaanii yϞϞ. Yennu Bija Yiisa baar a wun biir Sintaanii toonae.

<sup>9</sup> Binba kur tee Yennu waas nyii bi Baa Yennue, ki ki tuun biiti. Bi ki fit tuun biiti, kimaan baa gaar bi Baa Yennu binbeη na paak. <sup>10</sup> Nnaan binba kur ki tuun popeenn toona, bi ki tee Yennu waas kaa. Ki bia jenna, binba kur ki loon bi naa waas, bi ki tee Yennu waas kaa. Nnanne want binba tee Yennu waas nan binba tee Sintaanii waas.

### *Taa sii loon ti leeb bianjinba*

<sup>11</sup> Yaa din dϞη gbat Yiisa maan nba pinpiik ni na tee nnae: a tii loon ti leeb. <sup>12</sup> Li ki ηan ki tii be nan Keenn nba din be bianjinba na; ηϞϞ din tee bonbiiuk daanϞ Sintaanii yϞϞ, ki kpii u waarϞ. Bee paake ki u din kpiiu? Kimaan u waarϞ toona din ηan, ηaan ki u yar bi. <sup>13</sup> TϞn, n naa waas, li-i tee ki tingbouη na ηaateeb nami, i daa te ki li tei bakitnaunju.

<sup>14</sup> Taa loon ti naa waas na, ñanne want nan ti nyii kuun paŋ ni, ki be manfoor nba kaa gbennu ni. Ñaan daanɔ nba ki mɔk li lonbooru, ɲɔɔ ɲarin biar be kuun paŋ nie. <sup>15</sup> Ki jenna, wunba mun nân u naa bik, u tee nikpiiruko; ki i mi nan manfoor nba kaa gbennu kaa nikpiiruk ni.

<sup>16</sup> Gotir man, Yiisa nba din gaar ti paak ki kpo nae wantit lomm nba tee bianjinba; ki li mun kpaalalase ki tin chibin ti saanmanii ti naa waas paak. <sup>17</sup> Daanɔ nba mɔk ki li janito, ɲaan la ki u naa bik pot siar, ki u baka kaa u ni, Yennu lomm kaa daanɔ maŋ ni. <sup>18</sup> N waas, ti lomm maŋ daa be ti mɔi ni kuukɔɔ kaa; ɲaan kii tee barmɔnii lomm nba sommit niibe.

### *Bianjinba ki ti sii mɔk parcheenn Yennu boor*

<sup>19</sup> Li-i tee ki ti tuun nna, ɲanne ki ti saa bann nan ti waa barmɔnii wannu, ki bia sii mɔk parcheenn Yennu boor. <sup>20</sup> Li-i tee ki ti dudukit wantit nan ti mɔk biit, ɲaant man ki ti tiar nan Yennu-e chee ti dudukit, ki bia mi barii kur. <sup>21</sup> Tɔŋ, n walonkai, ti dudukit-i kii wannit nan ti tun bonkpetiri, ɲann ti mɔk parcheenn Yennu boor. <sup>22</sup> Ki jenna, ti-i dia u sennii ki tuun linba pent u pari, ɲanne saa te ki u teent linba ki ti meio. <sup>23</sup> Linba nae tee u sennu maŋ, a ti teen u Bija Yiisa Masia yada, kii loon ti leeb nan waa sennit bianjinba na. <sup>24</sup> Binba kur dia u sennii maŋ, ɲamme gaa nanɔ, ki u mun be bi ni. Ñanne teen ki ti bann nan u yɔɔ be ti ni, kimaan u Seyeŋ na be ti ni.

## 4

### *Ki jiin Yennu Seyeeŋ bannu po*

<sup>1</sup> N walonkai, i daa tee binba kur yaa bi mək Yennu Seyeeŋ na maan yada, ŋaan bikintib man, ki laan bi sei maŋ nyii Yennu boor amii lee, kimaan faak səkiniinba bonchiann nba kpann niib na poŋ baara, ki lin niib ni.

<sup>2</sup> Wunba kur ki seek piak u ni, ki u yaa u teen yada a bi din mar Yiisa Masia nisaarike, ŋɔɔe mək Seek nba nyii Yennu peŋ. Li-i tee ki u yeen nna, ŋanne ki ti saa bann nan li tee Yennu Seyeeŋe. <sup>3</sup> ŋaan wunba ki seek piak u ni, ki u yaa u ki teen yada nan bi mar Yiisa nisaarike, ŋɔɔe ki mək Yennu Seyeeŋi. Li seek tee Yiisa dataak na yare. Bi din poŋ beti nan Yiisa dataak maŋ saa baara, ki mətana u poŋ baar tingbouŋ na niwa.

<sup>4</sup> N waas, yimm tee Yennu yabe, ki Yennu Seyeeŋ be i ni, ki mək paŋ ki gar Sintaanii nba be tingbouŋ na ni. ŋanne te ki i nyann faak səkiniinba maŋ. <sup>5</sup> ŋamme tee tingbouŋ na yab. Li paak te ki bi piak tingbouŋ na niɔŋ po, ki tingbouŋ na ŋaateeb fiin bi po. <sup>6</sup> ŋaan timm ŋarin tee Yennu yabe; ki binba mi Yennu, ŋamme fiin ti maan ni. ŋaan binba ki tee Yennu yabi, bi ki fiin ti po. ŋanne te ki ti saa bann wunba mək Yennu Seyeeŋ nba want barmonii wannu, nan wunba mək Sintaanii seek nba want faak wannu na.

### *Yennu tee lomme*

<sup>7</sup> N walonkai, tii loon ti leeb man, kimaan lomm tee Yennu yare, ki binba mək lomm,



ɲamme tee Yennu waas ki bia miu. <sup>8</sup> Yennu tee lomme, ki binba ki mək lommu, bi ki miu. <sup>9</sup> Yennu din sikin u Biyemmir tingbouŋ na ni a tin la manfoor u paak, ki nae fiit wannit nan Yennu set loont. <sup>10</sup> Lomm nba set tee lomm nan barmɔnii ki tee timm kaa loon ɲoo Yennu, ɲaan li tee ɲoo Yennu-e din loont, ki sikin u Bija tingbouŋ na ni ki u gaar ti paak ki kpo, ki teen ti maruŋ ɲoo Yennu boor, a tin la nyikinab ti biit paak.

<sup>11</sup> N walonkai, Yennu nba loont bianjinba na, li kpaa talas ki tii munii loon ti leeb nna. <sup>12</sup> Soɔ kaa ki mi la Yennu nan u ninbina, ɲaan ti-i loon ti leebie, Yennu sii yoo be ti ni, ki ti sii mək lomm nba ki u teent na nan barmɔnii.

<sup>13</sup> Ɲooe bia sikin u Seyeen ki turit, ɲanne te ki ti bann nan ti gaa nano, ki u mun be ti ni. <sup>14</sup> Linba pukin biak, ti din laat u Bija, ki motana ti moontir nan u Baa Yennu-e sikino tingbouŋ na ni, a wuu tee tingbouŋ na ɲaateeb Tinntoo. <sup>15</sup> Wunba yaa u teen yada nan Yiisa tee Yennu Bija, ɲooe ki Yennu be u ni, ki u mun bia gaa nan Yennu. <sup>16</sup> Ki ti moŋ moŋ mun bann Yennu nba loont bianjinba, ki bia teen yada nan u set loont.

Yennu tee lomme, ki daano nba yoo mək lomm nna, ɲooe gaa nan Yennu, ki Yennu mun be u ni. <sup>17</sup> Ki jenna, li-i tee ki ti waa lomm sonu nan barmɔnii, Yennu buut daar-i tani baar, ti kii mək jijeet, kimaan Yiisa binben nba tee bianjinba na, ti binben mun tee nnae tingbouŋ na ni. <sup>18</sup> Ti-i mək lomm, jijeet sii kaa. Li-i tee ki lomm setik be, jijeet kan la yaak kii be ti ni, kimaan tubdatu

paake ki ti tuu jee. Li-i tee ki niro mok jijeet, u ki mok lomm nan barmonii.

<sup>19</sup> Yennu-e sint loonit; nanne teen ki ti mun mok lomm. <sup>20</sup> Daano nba yaa u loon Yennu, naan bia ki loon u naa bik, u tee faak daano. Li-i tee ki u ki loon u naa bik nba ki u laato nan u ninbina, nlee ki u sii fit loon Yennu nba ki u ki laato na nan u ninbina? <sup>21</sup> Yiisa din senn sennu ki yet a wunba loon Yennu, see ki u loon u naa bik mun.

## 5

### *Taa saa nyann jinjammii bianjinba*

<sup>1</sup> Binba kur teen yada nan Yiisa tee Yennu Niganntoo Masia na, li yabe tee Yennu waas. Ki daano nba loon niro, u bia sii loon niro man waase. <sup>2</sup> Li-i tee ki ti loon Yennu ki tuun linba ki u sennii want na, nanne saa te ki tin bann nan ti loon Yennu waas; <sup>3</sup> ki li-i biaki tee ki ti dia u sennu, nanne want nan ti loono. Ki bia jenna, u sennu man ki paari, <sup>4</sup> kimaan binba kur tee Yennu waas, namme fit nyant tingboung na ni jinjammii. Linba te ki ti nyant tingboung na jinjammii na tee ti yada teenu nie. <sup>5</sup> Ki nmee sii nyant jinjammii manji? Wunba teen yada nan Yiisa tee Yennu Bija.

<sup>6</sup> Noo Yiisa Masia-e tee wunba din baar nan nyun nan son; u din ki baar nan nyun kuukoo kaa, naan u din baar nan son biak. Ki Yennu Seyeeng tee siaradaano, kimaan Seyeeng mane tee barmonii daano. <sup>7</sup> Ton, binba tee siaradamm man tee bantaa: <sup>8</sup> namme tee Yennu Seyeeng, nan nyun nan son man; ki bi bantaa na taan moyomm ki tee siara. <sup>9</sup> Nnae ki Yennu teen

siara u Bija Yiisa po, ki u siara maŋ chee niro yar. Ti-i tee niro siara yadaie, ŋann ti saa teen Yennu siarae yada ki gar niro yar. <sup>10</sup>Wunba teen Yennu Bija maŋ yada, ŋoƆe mɔk Yennu siara maŋ u par ni; ki wunba ki teen u siara maŋ yada, u yiino faak daano na, kimaan u ki teen yada nan linba ki Yennu pak u Bija po na tee monii. <sup>11</sup>Yennu siara maŋ tee nnae: a u turit manfoor nba kaa gbennu, ki manfoor maŋ nyii u Bija Yiisa nie. <sup>12</sup>Wunba gaa nan Yennu Bija na, ŋoƆe mɔk manfoor maŋ; ŋaan wunba ki gaa nan Yennu Bija maŋ-i, u ki mɔk li manfoori.

*Ki jiin manfoor nba kaa gbennu na po*

<sup>13</sup>N sobin gbouŋ na ki teen yimm nba teen Yennu Bija yada nae, kimaan n loon ki i bann nan i mɔk manfoor nba kaa gbennu. <sup>14</sup>Tɔn, ti mei Yennu nan parcheenn, kimaan ti mi nan li-i tee ki ti meio linba ki u loon wun turit na, tii mi nan u gaan ti miaru. <sup>15</sup>Ti-i mi nan u set gaan ti miaru, tin bann nan ti poŋ gaar linba ki ti miaro li po nawa.

<sup>16</sup>Soo-i laat u naa bik ki u tuun biit nba kan baar nan kuumi, li daano-ii mei Yennu u paak, ki Yennu n chab biitdaano maŋ ki turɔ manfoor, kimaan u chabit binba tuun biit nba ki tee kuun yar ki teemm manfoa. Naan toonbisiar be, ki tee kuun toonn. N ki yaa yii mei Yennu kii teen binba tuun biit maŋ booru kaa. <sup>17</sup>Toona kur nba ki ŋan lek tee biite, ŋaan toonbisiar be ki kan baar nan kuumi. <sup>18</sup>Ki ti mi nan damm nba tee Yennu yab, bi ki tuun biiti, kimaan Yennu Bija Yiisa guub, ki bonbiuk daano Sintaanii kan fit

teemm siari. <sup>19</sup> Ki ti bia mi nan timm Masiaweira tee Yennu yabe, ŋaan tingboun na ŋaateeb kur nba ki tee Masiaweira na be Sintaanii nuu nie.

<sup>20</sup> Ti mi nan Yennu Bija Yiisa din sik tingboun na ni ki tan turit yan a tin bann ŋoo barmonii Yennu. Taa gaa nan u Bija Yiisa Masia na paak, ŋanne bia te ki ti gaa nan u Baa Yennu; ki ŋooe set tee barmonii Yennu, ki bia tee daano nba teent manfoor nba kaa gbennu.

<sup>21</sup> N waas, nyint i moŋ pata ni man.

**Yennu Gbouj Moor**  
**Bimoba: Yennu Gbouj Moor Bible**

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 29 Jan 2022

00d89ba0-4677-52d9-9bc5-aa3d7c5c966d